

Na osnovu člana 26 stav 1. tačka 2. Statuta Grada Sarajeva („Službene novine Kantona Sarajevo“, broj 34/08) i člana 60. Zakona o platama i naknadama u organima vlasti Federacije Bosne i Hercegovine („Službene novine Federacije BiH“, br. 45/10 i 111/12), Gradsko vijeće Grada Sarajeva, na sjednici održanoj 24.02.2016. godine, donijelo je

**ODLUKU**  
*o platama i naknadama u organima Grada Sarajeva*

**I - OSNOVNE ODREDBE**

**Član 1.**

**(Predmet reguliranja)**

- (1) Ovom odlukom uređuju se: pravo, visina i uslovi za ostvarivanje novčane naknade za vršenje funkcije gradskog vijećnika i pravo na druge naknade za materijalne troškove koji nastanu u vršenju funkcije gradskog vijećnika, odnosno u vršenju dužnosti člana radnog tijela Gradskog vijeća za:
  - a. gradske vijećnike u Gradskom vijeću Grada Sarajeva (u daljnjem tekstu: Gradsko vijeće) za vrijeme vršenja vijećničke dužnosti;
  - b. članove Kolegija Gradskog vijeća;
  - c. članove radnih tijela Gradskog vijeća.
- (2) Ovom odlukom uređuju se i prava iz radnog odnosa, usklađuju se plate, platni razredi i koeficijenti za obračun plate sa Zakonom o platama i naknadama u organima vlasti Federacije Bosne i Hercegovine, druga novčana primanja i prava na naknade za materijalne troškove, te druga prava i naknade za:
  - a. funkcionere koje bira i imenuje Gradsko vijeće: Predsjedavajući Gradskog vijeća i zamjenici predsjedavajućeg Gradskog vijeća, Gradonačelnik i zamjenici gradonačelnika Grada Sarajeva, sekretar Gradskog vijeća, gradski pravobranilac i zamjenik gradskog pravobraniloca (u daljnjem tekstu: funkcioneri);
  - b. savjetnike koje imenuju funkcioneri (u daljnjem tekstu: savjetnici).
- (3) Ovom odlukom usklađuju se plate i naknade državnih službenika i namještenika u organima Grada Sarajeva i Pravobranilaštvu Grada Sarajeva u skladu sa Zakonom o platama i naknadama u organima vlasti Federacije Bosne i Hercegovine.
- (4) Ovom odlukom utvrđuje se nadležnost za donošenje Pravilnika o platama, naknadama i drugim materijalnim pravima u organima Grada Sarajeva i Pravobranilaštvu Grada Sarajeva.

**Član 2.**

**(Načela )**

Pri određivanju iznosa plata i naknada u organima Grada Sarajeva poštivaju se načela utvrđena Zakonom o platama i naknadama u organima vlasti Federacije Bosne i Hercegovine:

- (1) Ista plata za isto radno mjesto: prema ovom načelu zaposleni u organima vlasti koji obavljaju poslove istog radnog mjesta, odnosno iste ili slične poslove imaju pravo na istu osnovnu plaću po vrsti i stepenu stručne spreme.

**Član 3.**  
**(Budžetsko osiguranje sredstava za plate i naknade)**

Finansijska sredstva za plate, naknade i druga primanja lica iz člana 1. Odluke, planiraju se i osiguravaju u budžetu Grada Sarajeva.

**Član 4.**  
**(Način utvrđivanja osnovice za obračun plate)**

- (1) U organima državne službe se primjenjuje osnovica za obračun plate utvrđene članom 5. Zakona.
- (2) Gradonačelnik će u dogovoru sa sindikatom utvrditi osnovicu za obračun plate u skladu sa Zakonom.
- (3) Ukoliko se gradonačelnik i sindikat ne dogovore o visini osnovice, ranije dogovorena osnovica ostaje na snazi do dogovora gradonačelnika i sindikata, a najduže 90 dana.

**Član 5.**  
**(Elementi za utvrđivanje osnovne plate)**

- (1) Osnovna plata utvrđuje se množenjem osnovice za platu sa utvrđenim koeficijentom platnog razreda i tako utvrđen iznos uvećava se za 0,5 za svaku započetu godinu penzijskog staža, a najviše do 20%.
- (2) Osnovna plata ne može biti manja od 70% prosječne neto plate isplaćene u Federaciji Bosne i Hercegovine prema posljednjem objavljenom statističkom podatku.
- (3) U slučaju da množenjem utvrđene osnovice i pripadajućeg koeficijenta osnovna plata iznosi manje od 70% prosječne plate, zaposleniku će se isplatiti plata u navedenom postotku.
- (4) Osnovna plata obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.
- (5) Ukoliko zaposlenik radi s nepunim radnim vremenom, u skladu s posebnim zakonom ili drugim propisima, osnovna plata odredit će se srazmjerno vremenu provedenom na radu.
- (6) Puno radno vrijeme zaposlenih je 40 sati sedmično.

**Član 6.**  
**(Koeficijenti za obračun plata)**

- (1) O visini koeficijenata za obračun plata iz ove Odluke odlučuje Gradsko vijeće, na prijedlog Gradonačelnika i Administrativne komisije.
- (2) Administrativna komisija utvrđuje prijedlog koeficijenata za obračun plata i naknada za gradske vijećnike, radna tijela Gradskog vijeća, funkcionere i savjetnike funkcionera, te državne službenike i namještenike u Službi Gradskog vijeća, na prijedlog sekretara Gradskog vijeća, uz mišljenje Predsjedavajućeg Gradskog vijeća.

**Član 7.**  
**(Pravo na platu prema radnom mjestu)**

Funkcioner, savjetnik, državni službenik i namještenik u organima Grada Sarajeva ima pravo na platu koja odgovara funkciji, odnosno radnom mjestu na koje je postavljen u skladu sa Zakonom, gradskim propisima i provedbenima aktima.

**Član 8.**  
**(Bruto i neto plata)**

- (1) Plata se u organima Grada Sarajeva utvrđuje u bruto i neto iznosu.
- (2) Plata u bruto iznosu obuhvata neto platu, poreze i doprinose.
- (3) Iznos neto i bruto plate, kao i način obračuna plate, te redovne mjesečne naknade i odbici iz plate prikazuju se na mjesečnoj platnoj listi.

**Član 9.**  
**(Isplata plata)**

- (1) Plata se obračunava za jedan mjesec unatrag, a isplaćuje za prethodni mjesec, u skladu sa važećim zakonom.
- (2) Plate iz stava 1. ovog člana, kao i svaka izmjena u visini plate, utvrđuje se rješenjem koja za državne službenike i namještenike uposlene u Službi Gradskog vijeća donosi sekretar Gradskog vijeća, za državne službenike i namještenike uposlene u Gradskoj upravi donosi Gradonačelnik, i Pravobranilac za uposlene u Pravobranilaštvu Grada Sarajeva.
- (3) Funkcioneri koji dužnost obavljaju profesionalno u skladu sa Statutom Grada Sarajeva i savjetnici, imaju pravo na platu.
- (4) Plata iz stava 1. ovog člana, kao i svaka izmjena u visini plate za funkcionere koji prava iz radnog odnosa ostvaruju u Službi Gradskog vijeća, te sekretara Gradskog vijeća, utvrđuje se rješenjem Administrativne komisije.
- (5) Plata iz stava 1. ovog člana, kao i svaka izmjena u visini plate za savjetnike Predsjedavajućeg Gradskog vijeća utvrđuje se rješenjem sekretara Gradskog vijeća, a za savjetnike Gradonačelnika rješenjem gradonačelnika.
- (6) Funkcioneri iz stava 3. ovog člana, pravo na platu ostvaruju stupanjem na dužnost, u skladu sa općim aktima Gradskog vijeća.
- (7) Gradonačelnik, pravo na platu ostvaruje danom imenovanja.
- (8) Savjetnici predsjedavajućeg Gradskog vijeća i Gradonačelnika, ostvaruju pravo na platu postavljanjem na radno mjesto.
- (9) Plata funkcionera koji dužnost obavlja profesionalno u skladu sa Statutom Grada Sarajeva, i savjetnika, kao i svaka izmjena u visini plate, utvrđuje se rješenjem.
- (10) Podaci o platama uposlenih u organima Grada Sarajeva su javni.

**II PLATE I NAKNADE FUNKCIONERA, SAVJETNIKA FUNKCIONERA I GRADSKIH VIJEĆNIKA U GRADU SARAJEVO**

**Član 10.**  
**(Radno pravni status funkcionera)**

- (1) Odluku o radno pravnom statusu Predsjedavajućeg Gradskog vijeća i zamjenika Predsjedavajućeg Gradskog vijeća donosi Gradsko vijeće na prijedlog Administrativne komisije, a na osnovu odluke Gradskog vijeća o izboru.

**Član 11.**  
**(Ostvarivanje prava iz radnog odnosa)**

- (1) Funkcioneri, sekretar Gradskog vijeća i savjetnici prava iz radnog odnosa ostvaruju u organima Grada Sarajeva i to:
- a) u Službi Gradskog vijeća: Predsjedavajući Gradskog vijeća i zamjenici Predsjedavajućeg Gradskog vijeća, sekretar Gradskog vijeća i savjetnici koje imenuje Predsjedavajući Gradskog vijeća;
  - b) u Gradskoj upravi: Gradonačelnik Grada Sarajeva, zamjenici Gradonačelnika Grada Sarajeva koji funkciju na koju su izabrani vrše profesionalno i savjetnici koje imenuje Gradonačelnik Grada Sarajeva.
  - c) u Pravobranilaštvu Grada Sarajeva: Pravobranilac Grada Sarajeva i zamjenik Pravobranioca Grada Sarajeva.
- (2) Administrativna komisija Gradskog vijeća donosi rješenje o zasnivanju radnog odnosa na osnovu odluke o izboru i odluke o radno pravnom statusu i to:
- a) na prijedlog sekretara Gradskog vijeća za: Predsjedavajućeg Gradskog vijeća, zamjenike Predsjedavajućeg Gradskog vijeća, sekretara Gradskog vijeća;
  - b) na prijedlog Gradonačelnika Grada Sarajeva za: Gradonačelnika Grada Sarajeva, zamjenike Gradonačelnika Grada Sarajeva, te
  - c) na prijedlog Pravobranioca za: Pravobranioca i zamjenika Pravobranioca Grada Sarajeva.
- (3) Sekretar Gradskog vijeća donosi rješenje o zasnivanju radnog odnosa na osnovu odluke o imenovanju za savjetnika Predsjedavajućeg Gradskog vijeća, a Gradonačelnik za savjetnika Gradonačelnika.

**Član 12.**  
**(Platni razredi i koeficijenti za plate funkcionera i savjetnika )**

Utvrđuju se sljedeći platni razredi i koeficijenti za plate funkcionera i savjetnika:

<b>Platni razred</b>	<b>Radno mjesto</b>	<b>Koeficijent</b>
<b>I</b>	Gradonačelnik	<b>9,00</b>
<b>II</b>	Predsjedavajući Gradskog vijeća	<b>8,50</b>
<b>III</b>	Zamjenici gradonačelnika, zamjenici Predsjedavajućeg Gradskog vijeća	<b>8,00</b>
<b>IV</b>	Gradski pravobranilac	<b>7,20</b>
<b>V</b>	Zamjenik gradskog pravobranioca	<b>6,50</b>
<b>VI</b>	Savjetnik gradonačelnika, savjetnik Predsjedavajućeg Gradskog vijeća	<b>6,00</b>

**Odjeljak A. Stalna mjesečna novčana primanja gradskih vijećnika**

**Član 13.**  
**(Naknade gradskim vijećnicima i članovima radnih tijela Gradskog vijeća)**

- (1) Vijećnicima u Gradskom vijeću, utvrđuje se pravo na mjesečnu naknadu za rad u Gradskom vijeću, kao i naknadu troškova, odnosno izgubljene zarade, tako što se osnovica za obračun plate, utvrđena u skladu sa Zakonom, množi sa koeficijentom 2.

- (2) Članovima Kolegija Gradskog vijeća utvrđuje se pravo na naknadu za rad u Kolegiju Gradskog vijeća, tako što se osnovica za obračun plate, utvrđena u skladu sa Zakonom, množi sa koeficijentom 0.30, i to za najviše dvije sjednice mjesečno.
- (3) Članovima radnih tijela Gradskog vijeća, utvrđuje se pravo na naknadu, tako što se osnovica za obračun plate, utvrđena u skladu sa Zakonom, množi sa koeficijentom 0.30, i to za najviše dvije sjednice mjesečno po radnom tijelu.
- (4) Članovima radnih tijela koji nisu gradski vijećnici pripada naknada iz stava 3. ovog člana ukoliko po pozivu prisustvuju sjednici Gradskog vijeća, a gradskom vijećniku koji je član radnog tijela ne pripada ova naknada.
- (5) Član radnog tijela, odnosno Kolegija Gradskog vijeća, uz uredan poziv, ima pravo na naknadu kao u stavu 3. ovoga člana.
- (6) Ukoliko gradski vijećnik ne ostvaruje po drugom osnovu, odgovarajuće socijalno osiguranje (zdravstveno i penziono), na njegov zahtjev i uz predočenu relevantnu dokumentaciju, tokom trajanja vijećničkog mandata ima pravo na ostvarivanje dobrovoljnog osiguranja putem uplata propisanih doprinosa iz sredstava Budžeta Grada Sarajeva.

#### **Član 14.**

##### **(Isplata naknada)**

Naknade iz člana 13. ove Odluke isplaćuju se mjesečno za prethodni mjesec, a na osnovu evidencije o prisustvu koju vodi Služba Gradskog vijeća.

#### **Član 15.**

##### **(Umanjenje naknade zbog izostanka)**

- (1) Član Kolegija Gradskog vijeća nema pravo na naknadu ukoliko izostane sa sjednice Kolegija Gradskog vijeća.
- (2) Član radnog tijela nema pravo na naknadu ukoliko izostane sa sjednice radnog tijela Gradskog vijeća.
- (3) Ukoliko, po osnovi pismenog ovlaštenja Kluba gradskog vijećnika, jedan gradski vijećnik mijenja drugoga u radu sjednice Kolegija Gradskog vijeća, odnosno u radu radnog tijela Gradskog vijeća, naknada pripada gradskom vijećniku koji prisustvuje sjednici Kolegija Gradskog vijeća, odnosno radnog tijela Gradskog vijeća.

### **Odjeljak B. Pravo na naknade gradskim vijećnicima, ostvarivanje prava, te druga prava funkcionera i savjetnika**

#### **Član 16.**

##### **(Pravo na naknade gradskim vijećnicima)**

- (1) Gradski vijećnik, funkcioner, sekretar Gradskog vijeća i savjetnik ostvaruju pravo na naknadu materijalnih troškova koji proizilaze iz vršenja funkcije na koju su izabrani i pravo na naknadu troškova za službeno putovanje koji proizilaze iz vršenja funkcije na koju su izabrani ili se realizira na osnovu odluke Gradskog vijeća kojom su određeni članovi delegacije.
- (2) Visina naknade za troškove službenog putovanja, dnevnica, naknada za smještaj, naknada za troškove prijevoza i ostale vrste naknada za službeno putovanje za gradske vijećnike, funkcionere, za sekretara Gradskog vijeća i savjetnike, utvrđuju se na način kako je to utvrđeno i za državne službenike u skladu sa važećim propisima u Federaciji Bosne i Hercegovine.
- (3) Funkcioner imenovan na funkciju u Gradskom vijeću ima pravo na prijevoz službenim putničkim automobilom.

- (4) Funkcioner imenovan na funkciju u Gradskom vijeću ima pravo na plaćene troškove službene komunikacije, informiranja, reprezentacije i druge troškove nastale iz vršenja dužnosti funkcionera imenovanog na funkciju u Gradskom vijeću.
- (5) Gradski vijećnik ima pravo na pomoć za potrebe liječenja u slučaju teške bolesti u skladu s Naredbom Federalnog ministarstva zdravstva o listi teških bolesti, odnosno teških tjelesnih povreda temeljem kojih se ostvaruje naknada za slučaj teške invalidnosti ili teške bolesti („Službene novine Federacije Bosne Hercegovine”, broj 30/05), te u slučaju smrti gradskog vijećnika, odnosno člana porodičnog domaćinstva gradskog vijećnika i to kako slijedi.
  - a. U slučaju povrede na radu, teške bolesti ili invalidnosti gradskog vijećnika isplaćuje se jednokratna novčana pomoć, u visini od dvije prosječne neto plate isplaćene u Federaciji Bosne i Hercegovine prema zadnjem objavljenom statističkom podatku.
  - b. Utvrđivanje nastanka teške bolesti ili invalidnosti u svakom konkretnom slučaju vrši Komisija za kvalifikaciju bolesti javne zdravstvene ustanove sa kojom postoji sporazum o pružanju ove usluge organima Grada Sarajeva.
  - c. Način i postupak ostvarivanja prava iz stava 1. i 2. ovog člana, vrši se na način kako je to pravilnikom o radnim odnosima, platama i naknadama, u skladu sa pozitivnim propisima utvrđeno za državne službenike i namještnike u Službi Gradskog vijeća Grada Sarajeva.

#### **Član 17.**

##### **(Pravo na naknade funkcionerima)**

- (1) Funkcionerima i savjetnicima pripada pravo na:
  - a. naknadu plate zbog bolesti ili povreda,
  - b. naknadu za troškove ishrane (topli obrok),
  - c. naknadu za godišnji odmor i plaćeni dopust,
  - d. naknadu za slučaj smrti, teške bolesti i invalidnosti,
  - e. otpremnina,
  - f. naknadu troškova za službeno putovanje,
  - g. naknadu za prijevoz na posao i s posla za funkcionere koji ne ostvaruju pravo na korištenje službenog putničkog automobila.
- (2) Naknade iz stava (1) ovog člana funkcioneri i savjetnici ostvaruju u skladu sa Zakonom o platama i naknadama u organima vlasti Federacije Bosne i Hercegovine („Službene novine Federacije Bosne i Hercegovine”, br. 45/10 i 111/12).

#### **Član 18.**

##### **(Nalogodavac za službeno putovanje)**

Nalogodavac za službeno putovanje je:

- a) sekretar Gradskog vijeća, uz saglasnost Predsjedavajućeg Gradskog vijeća za Predsjedavajućeg i zamjenike Predsjedavajućeg Gradskog vijeća, gradskog vijećnika, sekretara Gradskog vijeća i savjetnike Predsjedavajućeg Gradskog vijeća;
- b) gradonačelnik Grada Sarajeva za Gradonačelnika, zamjenika Gradonačelnika i savjetnike Gradonačelnika, te
- c) Administrativna komisija za Pravobranioca Grada Sarajeva, a Pravobranilac za zamjenika pravobranioca Grada Sarajeva.

**Član 19.**  
**(Druga prava)**

- (1) Administrativna komisija Gradskog vijeća donosi akt kojim se bliže uređuje pravo i uslovi za korištenje prijevoza službenim putničkim automobilom za funkcionere, sekretara Gradskog vijeća, pravobranioca Grada Sarajeva i savjetnike.
- (2) Administrativna komisija Gradskog vijeća donosi akte kojima se uređuju prava funkcionera, sekretara Gradskog vijeća, Pravobranioca i zamjenika Pravobranioca Grada Sarajeva i savjetnika, na plaćene troškove službene komunikacije, informiranja i reprezentacije, kao i druga prava i naknade, kao što je i dodatak na platu po osnovu posebnih uslova za rad koji pripada sekretaru Gradskog vijeća kao rukovodiocu organa uprave zbog obima i složenosti poslova i stepena odgovornosti.

**III PLATE I NAKNADE DRŽAVNIH SLUŽBENIKA I NAMJEŠTENIKA U ORGANIMA GRADA SARAJEVA**

**Odjeljak A. Platni razredi i koeficijenti za plate državnih službenika i namještenika u organima Grada Sarajeva**

**Član 20.**  
**(Platni razredi i koeficijenti za plate državnih službenika u organima Grada Sarajeva)**

Utvrđuju se sljedeći platni razredi i koeficijenti za plate državnih službenika Grada Sarajeva:

<b>Platni razred</b>	<b>Radno mjesto</b>	<b>Koeficijent</b>
<b>I</b>	- sekretar Gradskog vijeća - sekretar Gradske uprave	<b>6,50</b>
<b>II</b>	- pomoćnik Gradonačelnika	<b>5,70</b>
<b>III</b>	- direktor Zavoda za informatiku i telematiku Grada Sarajeva - interni revizor - glavni komunalni inspektor - stručni savjetnik u Pravobranilaštvu Grada Sarajeva	<b>5,20</b>
<b>IV</b>	- šef Kabineta Predsjedavajućeg i zamjenika Predsjedavajućeg Gradskog vijeća - šef Odjeljenja za stručne poslove u Službi Gradskog vijeća - šef Odjeljenja u Stručnoj službi gradonačelnika Grada Sarajeva	<b>4,60</b>
<b>V</b>	- šef Odsjeka	<b>4,50</b>
<b>VI</b>	- gradski inspektor	<b>4,30</b>
<b>VII</b>	- stručni savjetnik	<b>4,10</b>
<b>VIII</b>	- viši stručni saradnik	<b>3,90</b>
<b>IX</b>	- stručni saradnik	<b>3,70</b>

**Član 21.**  
**(Platni razredi i koeficijenti za plate namještenika)**

Utvrđuju se sljedeći platni razredi i koeficijenti za plate namještenika Grada Sarajeva:

	<b>Radno mjesto</b>	<b>Koeficijent</b>
<b>I</b>	- viši samostalni referent (VŠS)	<b>3,10</b>
<b>II</b>	- šef unutrašnje organizacijske jedinice (SSS)	<b>2,80</b>
<b>III</b>	- viši referent (SSS) i VKV radnik	<b>2,70</b>
<b>IV</b>	- referent (SSS) i KV III i IV stepen	<b>2,60</b>

**Odjeljak B. Dodaci na platu državnih službenika i namještenika**

**Član 22.**  
**(Vrste dodatka na platu)**

- (1) Državni službenik i namještenik ima pravo na dodatak na platu po osnovu posebnih uslova rada i po osnovu naknade za prekovremeni rad.
- (2) Dodatak na platu iz stava 1. ovog člana čini sastavni dio osnovne plate.

**Član 23.**  
**(Dodatak na platu po osnovu posebnih uslova rada)**

- (1) Dodatak na platu po osnovu posebnih uslova rada pripada državnim službenicima koji obavljaju poslove inspektora i taj dodatak iznosi 20% do 30% od osnovne plate, što će se precizirati Pravilnikom.
- (2) Dodatak na platu za ostale poslove koji se vrše pod posebnim uslovima, određenim posebnim zakonom, može biti od 10% do 20%, što će se precizirati Pravilnikom.
- (3) Poseban dodatak iz stava 1. i 2. ovog člana obračunava se na osnovnu plaću bez dijela plate po osnovu radnog staža i čini sastavni dio plate.
- (4) Visina dodatka na platu po osnovu posebnih uslova rada iz stava 1. i 2. ovog člana utvrđuje se pravilnikom o radnim odnosima, platama i naknadama, u skladu sa kriterijima utvrđenim kolektivnim ugovorom.

**Odjeljak C. Naknade državnih službenika i namještenika**

**Član 24**  
**(Vrste naknada)**

Državni službenik i namještenik ima pravo na naknade utvrđene u odredbama člana 25. do 39. ove odluke.



## **Član 25.**

### **(Naknada za prekovremeni rad, rad u neradne dane, noćni rad i rad u dane državnih praznika)**

- (1) U slučaju prekovremenog rada, rada u neradne dane, noćnog rada ili rada u dane državnih praznika, državni službenik i namještenik ima pravo na naknadu osnovne plate, razmjerno vremenu trajanja tog rada, uvećanom za postotak utvrđen kolektivnim ugovorom.
- (2) Visina naknade i uslovi za ostvarivanje naknade utvrđuju se pravilnikom o radnim odnosima, platama i naknadama, u skladu sa kolektivnim ugovorom.
- (3) Obračun naknade iz stava 1. ovog člana, vrši se od osnovne plate, bez dijela plate po osnovu penzijskog staža. Naknada iz ovog člana čini sastavni dio plate.

## **Član 26.**

### **(Vrste naknada)**

Državni službenik i namještenik ima pravo na sljedeće naknade koje nemaju karakter plate:

- naknada za ishranu tokom rada – topli obrok;
- naknada za prijevoz na posao i s posla;
- naknada na ime korištenja godišnjeg odmora – regres;
- naknada za službeno putovanje;
- naknada za bolovanje;
- naknada za slučaj povrede na radu, teške bolesti i invalidnosti;
- naknada za slučaj smrti i pravo na osiguranje od posljedica nesretnog slučaja;
- naknada za porodiljski dopust;
- plaćeni dopust;
- naknada za rad u komisijama koje se održavaju poslje isteka radnog vremena;
- otpremnina;
- naknada u slučaju prekobrojnosti.

## **Član 27.**

### **(Naknada za ishranu tokom rada)**

- (1) Državni službenik i namještenik ima pravo na novčanu naknadu za ishranu u toku rada (topli obrok), u visini 1% prosječne neto plate isplaćene u Federaciji Bosne i Hercegovine po zadnjem statističkom podatku.
- (2) Naknada iz stava 1. ovog člana neće se obračunavati za vrijeme odsutnosti s posla.

## **Član 28.**

### **(Naknada za prijevoz na posao i s posla)**

- (1) Državnom službeniku i namješteniku kome nije organizovan službeni prijevoz na posao i s posla, čije je mjesto stanovanja udaljeno najmanje 2 km od mjesta rada, pripada naknada za troškove prijevoza, u visini mjesečne karte gradskog, prigradskog i međugradskog saobraćaja.
- (2) U međugradski saobraćaj spadaju mjesta koja su udaljena od mjesta rada do 70 km.

**Član 29.**  
**(Regres za godišnji odmor)**

- (1) Državni službenik i namještenik ima pravo na naknadu na ime regresa za korištenje godišnjeg odmora u visini 50% prosječne neto plate isplaćene u Federaciji Bosne i Hercegovine po zadnjem objavljenom statističkom podatku.
- (2) Pravo na regres iz stava 1. ovog člana ima svaki državni službenik i namještenik koji je u toku tekuće kalendarske godine ostvario pravo na godišnji odmor.

**Član 30.**  
**(Naknada za službeno putovanje)**

- (1) Državni službenik i namještenik ima pravo na naknadu za troškove službenog putovanja na području Federacije Bosne i Hercegovine, odnosno Bosne i Hercegovine, kao i za putovanja u inostranstvo, na koje se upućuje radi obavljanja službenih poslova i zadataka.
- (2) Visina i način ostvarivanja naknade iz stava 1. ovog člana utvrđuje se pravilnikom o radnim odnosima, platama i naknadama, u skladu sa pozitivnim propisima i kolektivnim ugovorom.

**Član 31.**  
**(Naknada za bolovanje)**

- (1) Državni službenik i namještenik ima pravo na naknadu plate za vrijeme privremene spriječenosti za rad (bolovanje) do 42 kalendarska dana u visini njegove neto plate isplaćene za prethodni mjesec.
- (2) Naknada plate za bolovanje preko 42 dana iz stava (1) ovog člana ostvaruje se po propisu Kantona Sarajevo kojim se uređuje naknada za ovo bolovanje, s tim da razliku do pune plate isplaćuje poslodavac.

**Član 32.**  
**(Naknada za slučaj povrede na radu, teške bolesti i invalidnosti)**

- (1) U slučaju povrede na radu, teške bolesti ili invalidnosti državnog službenika i namještenika ili člana njegove uže porodice isplaćuje se jednokratna novčana pomoć, u visini od dvije prosječne neto plate isplaćene u Federaciji Bosne i Hercegovine prema zadnjem objavljenom statističkom podatku.
- (2) Utvrđivanje nastanka teške bolesti ili invalidnosti u svakom konkretnom slučaju vrši Komisija za kvalifikaciju bolesti javne zdravstvene ustanove sa kojom postoji sporazum o pružanju ove usluge.
- (3) Način i postupak ostvarivanja prava iz stava 1. i 2. ovog člana, utvrđuje se pravilnikom o radnim odnosima, platama i naknadama, u skladu sa pozitivnim propisima.

**Član 33.**  
**(Naknada za slučaj smrti i pravo na osiguranje od posljedica nesretnog slučaja)**

- (1) U slučaju smrti državnog službenika, odnosno namještenika njegovoj porodici se isplaćuju troškovi sahrane u visini od četiri prosječne neto plate isplaćene u Federaciji Bosne i Hercegovine prema zadnjem objavljenom statističkom podatku.
- (2) Naknada iz stava 1. ovog člana isplaćuje se državom službeniku, odnosno namješteniku, i u slučaju smrti člana uže porodice državnog službenika ili namještenika.

- (3) Ukoliko u organima Grada Sarajeva rade dva ili više članova porodice, troškovi sahrane iz stava 1. ovog člana isplaćuju se samo jednom zaposlenom članu porodice.
- (4) Državni službenik i namještenik ima pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa.
- (5) Visina osiguranja po ovoj osnovi određuje se prema polici osiguranja od posljedica nesretnog slučaja odnosno polici osiguranja od prirodne smrti.
- (6) Ugovor o osiguranju sa odgovarajućom osiguravajućom kućom zaključuje gradonačelnik za sve državne službenike i namještenike zaposlene u Gradu Sarajevu, u skladu sa Kolektivnim ugovorom.

**Član 34.**  
**(Definicija člana uže porodice)**

Članom uže porodice državnog službenika ili namještenika, u smislu čl. 32. i 33. ove odluke, smatraju se: bračni i vanbračni drug ako žive u zajedničkom domaćinstvu, dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina odnosno do 26 godina starosti ako se nalaze na redovnom školovanju i nisu u radnom odnosu, djeca nesposobna za rad bez obzira na starosnu dob), roditelji (otac, majka, očuh, maćeha i usvojitelji) pod uslovom da žive u zajedničkom domaćinstvu sa državnim službenikom i namještenikom, braća i sestre bez roditelja do 18 odnosno do 26 godina starosti ako se nalaze na redovnom školovanju i nemaju drugih prihoda već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, pod uslovom da s njima živi u zajedničkom domaćinstvu i unučad ako nemaju roditelja i žive u zajedničkom domaćinstvu s državnim službenikom ili namještenikom.

**Član 35.**  
**(Naknada za porodiljsko odsustvo)**

Državni službenik i namještenik, za vrijeme porodiljskog odsustva, ima pravo na naknadu plate prema propisima Kantona kojim se uređuje ova oblast, prema mjestu uplate doprinosa, s tim da se razlika do visine pune plate, kao i pripadajući porezi i doprinosi, isplaćuju iz Budžeta Grada Sarajeva.

**Član 36.**  
**(Plaćeni dopust)**

- (1) Državni službenik i namještenik ima pravo na naknadu plate i to u visini svoje neto plate iz prethodnog mjeseca, za vrijeme korištenja plaćenog dopusta, koji traje do 30 dana.
- (2) Način i postupak ostvarivanja prava iz stava 1. ovog člana, utvrđuje se pravilnikom o radnim odnosima, platama i naknadama, u skladu sa pozitivnim propisima.

**Član 37.**  
**(Naknada za rad u komisijama)**

- (1) Državni službenici i namještenici, kao članovi komisija koje se formiraju na osnovu rješenja rukovodioca organa uprave imaju pravo na maksimalnu mjesečnu naknadu za rad u komisijama, a čije osnivanje je predviđeno zakonom, i to do visine jedne i pol (1,5) osnovice iz člana 4. ove odluke, a koje se održavaju poslije isteka radnog vremena.
- (2) Visina naknade, iz stava 1. ovog člana, utvrđuje se rješenjem o formiranju komisije.

**Član 38.**  
**(Otpremnina)**

Državni službenik i namještenik ima pravo na otpremninu pri odlasku u penziju u visini svojih pet ostvarenih prosječnih neto plata isplaćenih u prethodnih pet mjeseci.

**Član 39.**  
**(Naknada u slučaju prekobrojnosti)**

U slučaju prestanka radnog odnosa državnog službenika odnosno namještenika, zbog prekobrojnosti, taj državni službenik, odnosno namještenik, ima pravo na naknadu i to

- a. za radni staž do 10 godina, u visini tri neto plate državnog službenika odnosno namještenika,
- b. za radni staž od 11 do 30 godina, u visini šest neto plata državnog službenika odnosno namještenika
- c. za radni staž preko 30 godina, u visini deset neto plata državnog službenika odnosno namještenika.

**IV PLATE PRIPRAVNIKA I NAKNADE VOLONTERA**

**Član 40.**  
**(Visina plate za pripravnike)**

- (1) Plata pripravnika visoke, više i srednje stručne spreme utvrđuje se u iznosu, i to
  - a. za visoku školsku spremu u iznosu od 80% od početne osnovne plate utvrđene za radno mjesto stručnog saradnika
  - b. za višu školsku spremu u iznosu od 80% od početne osnovne plate utvrđene za radno mjesto samostalnog referenta
  - c. za srednju školsku spremu u iznosu od 80% od početne osnovne plate utvrđene za radno mjesto referenta
- (2) Plata iz stava 1. ovog člana predstavlja dio osnovne plate, bez dijela plate koji se obračunava po osnovu penzijskog staža.

**Član 41.**  
**(Visina naknade za volontere)**

- (1) Volonteri visoke, više i srednje stručne spreme imaju pravo na naknadu, i to:
  - a. za visoku školsku spremu u iznosu od 35% od osnovne plate stručnog saradnika
  - b. za višu školsku spremu u iznosu od 35% od osnovne plate samostalnog referenta
  - c. za srednju školsku spremu u iznosu od 35% od osnovne plate referenta
- (2) Visina naknade iz stava 1. ovog člana određuje se od osnovne plate odgovarajuće školske spreme.

**V ZAVRŠNE ODREDBE**

**Član 42.**  
**(Obaveza usklađivanja propisa)**

U skladu sa ovom odlukom, pravilnicima o unutrašnjoj organizaciji u Gradskoj upravi, Gradskom vijeću i Pravobranilaštvu Grada Sarajeva, zakonskim i drugim propisima, gradonačelnik Grada, sekretar Gradskog vijeća i Pravobranilac Grada Sarajeva će donijeti međusobno usklađene pravilnike o platama, naknadama i drugim materijalnim pravima državnih službenika i namještenika u Gradskoj upravi, Službi Gradskog vijeća i Pravobranilaštvu Grada Sarajeva.

Pravilnici iz stava 1. ovog člana donijet će se u roku od 60 dana od dana stupanja na snagu ove odluke.

**Član 43.**  
**(Neposredna primjena Zakona i kolektivnog ugovora)**

Za sva pitanja iz oblasti plata i naknada koja nisu regulisana ovom Odlukom, neposredno će se primjenjivati odredbe zakona i kolektivnog ugovora.

**Član 44.**  
**(Prestanak primjene propisa)**

Stupanjem na snagu ove odluke prestaje primjena: Odluke o utvrđivanju platnih razreda i koeficijenata za plate rukovodećih i ostalih državnih službenika Gradske uprave Grada Sarajeva i Službe Gradskog vijeća Grada Sarajeva („Službene novine Kantona Sarajevo“, br. 3/05 i 35/06 i 4/09); Odluke o utvrđivanju platnih razreda i koeficijenata za plate namještenika organa Grada Sarajeva („Službene novine Kantona Sarajevo“, br. 15/06 i 4/09); Odluke o primanjima i drugim pravima vijećnika („Službene novine Kantona Sarajevo“, broj 39/05); Odluke o primanjima i drugim pravima funkcionera („Službene novine Kantona Sarajevo“, broj 39/05); Odluke o koeficijentima za obračun plata nosioca funkcija Grada Sarajeva („Službene novine Kantona Sarajevo“, broj 3/05); Odluke o dopuni Odluke o koeficijentima za obračun plata nosioca funkcija Grada Sarajeva („Službene novine Kantona Sarajevo“, broj 35/06), kao i primjena odredaba Odluke o osnivanju Pravobranilaštva Grada Sarajeva („Službene novine Kantona Sarajevo“, broj 20/10, 30/15) koje se odnose na radno-pravni status pravobranioca i zamjenika pravobranioca Grada Sarajeva.

**Član 45.**  
**(Izmjene i dopune Odluke)**

Izmjene i dopune Odluke vrše se na način i po postupku za njeno donošenje.

**Član 46.**  
**(Ravnopravnost spolova)**

Odredbe ove Odluke odnose se podjednako na lica muškog i ženskog spola, bez obzira na rod imenice upotrijebljen u tekstu Odluke.

**Član 47.**  
**(Stupanje na snagu)**

Ova Odluka stupa na snagu narednog dana od dana objavljivanja u „Službenim novinama Kantona Sarajevo“, a primjenjivat će se od 01.01. 2016. godine.

Broj:01-02-384 /16  
Datum:24. 02. 2016. godine



**PREDSJEDAVAJUĆI GRADSKOG VIJEĆA**

*Suljo Agić*  
**Suljo Agić**